



## ACORDO DE COLABORACIÓN ENTRE A AXENCIA GALEGA DE DESENVOLVEMENTO RURAL E A AXENCIA PARA A MODERNIZACIÓN TECNOLÓXICA DE GALICIA PARA O DESENVOLVEMENTO DE SISTEMAS DE INFORMACIÓN DE APOIO NA XESTIÓN DOS INSTRUMENTOS DE RECUPERACIÓN DA TERRA AGRARIA DE GALICIA

En Santiago de Compostela, na data da sinatura dixital

### REUNIDOS

Dunha parte, D.<sup>ª</sup> Inés Santé Riveira, en representación da Axencia Galega de Desenvolvemento Rural, con domicilio na Barcia, estrada Santiago-Noia, km. 3, 15897, Santiago de Compostela, en calidade de directora xeral, en virtude do nomeamento realizado polo Decreto 155/2020 (DOG núm. 190, do 18.09.2020) e actuando en virtude do seu cargo, conforme ao previsto no artigo 8 do Decreto 79/2011, do 6 de abril, polo que se aproba o Regulamento de Agader, e no exercicio facultades delegadas polo acordo do Consello de Dirección de Agader do 11 de xullo de 2013 (DOG núm. 148, do 05.08.2013).

Doutra parte, D.<sup>ª</sup> María del Mar Pereira Álvarez, directora da Axencia para a Modernización Tecnolóxica de Galicia, actuando en nome e representación da dita axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e o Decreto 91/2012, do 16 de marzo, polo que se nomea directora da Axencia para a Modernización Tecnolóxica de Galicia.

As partes recoñécense capacidade e representación suficientes para formalizar o presente acordo de colaboración, e na súa virtude

### EXPOÑEN

**PRIMEIRO.** Que, segundo o artigo 6 do Estatuto da Axencia para a Modernización Tecnolóxica de Galicia (en adiante, AMTEGA), aprobado polo Decreto 252/2011, do 15 de decembro, esta ten entre as súas competencias, a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo co artigo 5 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, queda desconcentrada na persoa titular da dirección da AMTEGA a competencia para subscribir con entidades públicas e privadas, en nome da AMTEGA, convenios de colaboración excluídos da lexislación de contratos do sector público.





**SEGUNDO.** A Axencia Galega de Desenvolvemento Rural Rural (en adiante, AGADER), creada como un ente de dereito público en virtude da disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo, e actualmente adscrita á Consellería do Medio Rural en virtude do Decreto 149/2018, do 5 de decembro, constitúese como o instrumento básico de actuación da Xunta de Galicia no fomento e na coordinación do desenvolvemento do territorio rural galego, para mellorar a as condicións de vida e evitar o despoboamento dese territorio.

Actualmente está en tramitación en sede parlamentaria a **Lei de recuperación da terra agraria de Galicia** para uso agrícola, gandeiro e forestal, co fin de acadar un desenvolvemento económico e social sostible no medio rural. O apoio á actividade agrícola e aos ingresos das explotacións agrarias familiares e nomeadamente ás mulleres agricultoras, o fomento da aplicación de prácticas agrícolas que contribúan ao mantemento dos ecosistemas e incrementen a capacidade de adaptación ao cambio climático, o fomento da xestión forestal sostible e activa, e a loita contra a degradación e o abandono dos solos agrarios son cuestións transversais presentes nesta lei, e eixos fundamentais do Pacto Verde Europeo, moi especialmente da Estratexia da Granxa á Mesa incluída nel, así como da Acción polo Clima e da Estratexia Forestal da Unión Europea.

Os instrumento de planificación son o marco para a ordenación dos usos do territorio rural. A localización das actividades agroforestais nos emprazamentos máis axeitados contribúe en grande medida ao seu éxito e, consecuentemente, favorece o progreso económico e a cohesión social do territorio rural. A planificación dos usos do solo facilita unha maior eficiencia económica das actividades agrarias ao mesmo tempo que garante a súa sostibilidade ambiental. A posta a disposición da información, así como o desenvolvemento de sistemas de información que permitan xestionar, difundir e optimizar a toma de decisión respecto destes instrumentos de ordenación -incluíndo o seu coñecemento por parte dos agricultores, gandeiros e silvicultores interesados- representan un eixo esencial para a eficiencia na consecución dos obxectivos que se definen na Lei de recuperación da terra agraria que, como se expuxo, está en tramitación parlamentaria.

**TERCEIRO.** A Lei 14/2013, do 26 de decembro, de racionalización do sector público autonómico, establece no seu artigo 14 que a Administración xeral da Comunidade Autónoma e as entidades do sector público, ou estas entre elas, poderán formalizar acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

A colaboración ou cooperación consistirá na participación conxunta e efectiva no desenvolvemento da actividade común, mediante achegas de traballos de organización, medios persoais e materiais ou recursos financeiros para a finalidade compartida, de acordo coas respectivas competencias, e será sempre diferente das estruturas contractuais onerosas reguladas na lexislación de contratos do sector público.





Tendo en conta o anterior, AGADER e a AMTEGA manifestan a súa vontade de colaboración e con tal fin fin asinan este acordo con suxeición ás seguintes

## CLÁUSULAS

### PRIMEIRA. Obxecto

O obxecto deste acordo é establecer as pautas que se seguirán na colaboración entre a Axencia Galega de Desenvolvemento Rural e a Axencia para a Modernización Tecnolóxica de Galicia para o desenvolvemento do proxecto “Sistemas de información de xestión dos instrumentos e procedementos de xestión de recuperación da terra agraria de Galicia”.

### SEGUNDA. Financiamento

O importe da achega de AGADER para a execución dos proxectos que se describen na cláusula terceira ascenderá a un máximo de SETECENTOS MIL EUROS (700.000 €), IVE incluído, coa seguinte distribución por anualidades:

| Anualidade | Importe   | Aplicación orzamentaria                         |
|------------|-----------|---|
| 2021       | 190.000 € | 14.A1.712A.640.0<br>(código proxecto 2021 0004) |
| 2022       | 510.000 € |   |
| TOTAL      | 700.000 € |   |

Este importe, será obxecto de retención de crédito segundo a distribución por anualidades indicada para a súa posterior baixa, na seguinte aplicación orzamentaria 14.A1.712A.640.0 (código proxecto 2021 0004) dos orzamentos de AGADER.

Posteriormente á formalización do presente acordo, remitirase á Dirección Xeral de Planificación e Orzamentos este acordo xunto coa documentación pertinente, para que se leve a cabo a modificación orzamentaria correspondente na aplicación 04.10.571A.732.00 da Secretaría Xeral da Presidencia, con correlativa ampliación de crédito na aplicación 04.A1.571A.626.0, código de proxecto 2014-00005, dos orzamentos da AMTEGA para as anualidades 2021 e 2022.





### TERCEIRA. Actuacións a desenvolver

Ao abeiro do presente acordo levaranse a cabo as seguintes actuacións pola **AMTEGA**:

a) Desenvolvemento de sistemas de información conforme aos requisitos funcionais establecidos por AGADER en relación ao obxecto deste acordo:

- Creación dun frontal ou portal *web* que permita o acceso á información relacionadas coa xestión e situación actualizada dos instrumentos de recuperación da terra agraria de Galicia
- Desenvolvemento dun rexistro de Banco de Explotacións de Galicia
- Creación e acceso, en colaboración co Instituto de Estudos do Territorio (IET), dun visor que permita a visualización das capas -proporcionadas por AGADER no formato que se estableza- dos instrumentos de recuperación da terra agraria de Galicia; así como a súa actualización
- Desenvolvemento dun sistema alfanumérico e gráfico que permita o apoio na xestión dos instrumentos mencionados
- Outros sistemas relacionados co obxecto e que acorden as partes, dentro dos límites do orzamento do acordo

b) A tramitación administrativa e a adxudicación do contratos e/ou expedientes que teñan lugar para a realización do obxecto anteriormente definido, de selo caso.

Para isto, a AMTEGA, como órgano de contratación, iniciará e aprobará os correspondentes expedientes de contratación. Asemade, correspóndelle o seguimento e a dirección das actuacións obxecto do contrato.

Por parte de **AGADER** participárase na definición detallada dos novos requisitos a implantar, así como na validación dos módulos e aplicacións que se desenvolvan, para permitir así a verificación da correcta funcionalidade construída de acordo aos requisitos indicados, no marco do obxecto do acordo.

Asemade desenvolverase polas partes calquera outra actuación que, sendo complementaria das anteriores e estando incluídas no seu obxecto, acorden AGADER e AMTEGA; sempre que o seu custo estimado non supere o importe da achega máxima recollida na cláusula segunda.

No caso de actuacións que non sexan complementarias das incluídas nesta cláusula, ou que requiran un incremento do orzamento asignado no presente acordo, será suficiente unha addenda a este acordo que engada ditas actuacións á presente cláusula e o financiamento relacionado.





A titularidade do produto ou resultado obtido coa execución das actividades obxecto do presente acordo, será da AMTEGA.

#### **CUARTA. Previsións de desenvolvemento**

Sen prexuízo do previsto na cláusula terceira, a colaboración derivada deste acordo poderá ser obxecto do desenvolvemento ulterior e concreción que sexa preciso, a través dos instrumentos ou das actuacións que se estimen necesarias para a súa consecución, de conformidade coa normativa vixente.

#### **QUINTA . Vixencia**

Este acordo producirá os seus efectos a partir da data da súa sinatura e a súa vixencia estenderase ata o momento que finalice a execución de todos os traballos previstos, con data límite o 31 de decembro de 2022.

O anterior, sen prexuízo de que antes da súa finalización se acorde polas partes unha addenda ao acordo na que se fixara a modificación ou a prórroga do acordo inicial e os novos compromisos das partes.

En todo caso, este acordo de colaboración queda condicionado á tramitación e autorización da modificación de crédito indicada na cláusula segunda.

#### **SEXTA. Réxime xurídico e resolución de conflitos**

Este acordo de colaboración ten natureza administrativa e, para a resolución das discrepancias que se poidan producir, será de aplicación o artigo 13 da Lei 16/2010, de 18 de decembro, de organización e funcionamento da Administración xeral e do sector público autonómico de Galicia.


#### **SÉTIMA. Transparencia e bo goberno**

As partes asinantes outorgan o seu consentimento para que os datos persoais e o resto das especificacións que constan neste acordo sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.





XUNTA DE GALICIA  
CONSELLERÍA DO MEDIO RURAL



E en proba de conformidade co exposto, asinan este acordo no lugar e data sinalados.

A directora da Axencia Galega de  
Desenvolvemento Rural  
(asinado dixitalmente)

Inés Santé Riveira

de A directora da Axencia para a Modernización  
Tecnolóxica  
(asinado dixitalmente)

María del Mar Pereira Álvarez

